

Sa nassione chi peldet su donu

O sardu, si ses sardu e si ses bonu,
Semper sa limba tua apas presente
No sias che ischiau ubbidiente
Faeddende sa limba 'e su padronu.

Sa nassione chi peldet su donu
De sa limba iscumparit lentamente,
Massimu si che l'essit dae mente
In iscritura che in arrejonu.

Sa limba 'e babbos e de jajos nostros
no l'usades pius nemmancu in domo
prite pobera e ruza la creides.

Si a iscola no che la jughides
Po la difunder menzus, dae como
Sezis dissardizende a fizos bostros.

Remundu Piras

Comune de Nughedu Santa Vitòria

Provìntzia de Aristanis



Sa redazione de *Novas nughedesas* est
contivizada dae su Servìtziu linguìsticu sardu
de su Comune de Nughedu Santa Vitòria
Sotziedade Cooperativa L'ALTRA CULTURA)

S'isportellu linguìsticu est a disponimentu de
tzitadinos, maistros de iscola, professores,
istudiantes pro cale si siat informatzione, duda,
bibliografia, sitografia in contu de sa limba
sarda, pro consulèntzias didàticas e pro
cussizos chi pertocant sas règulas de iscritura
de su sardu.

Su Servìtziu est apertu:

su mècuris
dae sas **08,00** oras a sas **14,00**

Comune de Nughedu Santa Vitòria

Provìntzia de Aristanis

www.comunenughedusv.it

Novas nughedesas

Newsletter periòdica de informatzione
istituzionale de su Comune de Nughedu
Santa Vitòria

At torradu a abèrrere s'isportellu linguistiku comunale.

Est torra in atividade s'isportellu linguistiku de su Comune, unu sinnale de importu de s'Amministratzone comunale pro s'amparu e valorizazzone de sa limba sarda.

Cun s'isportellu linguistiku su Comune tenet unu servìziu pro cale si siat bortadura in sardu: atos e documentos amministrativos, comunicatziones, avisos. Su servìziu est abertu a sos tzitadinos pro informatziones, cussizos e consulèntzias chi pertocant su sardu.

Su progetu, finantziadu dae sa Lege 482 de su 1999 – *Norme in materia di tutela delle minoranza linguistiche*, est istadu presentadu dae 8 biddas paris: Ardaule (capufilera), Bidoniu, Busache, Neoneli, Nughedu Santa Vitòria, Samugheo, Sorradile, Ula, comunidades atentas a su valore culturale e sotziale de sa limba sarda.

www.sardegnacultura.it

Su portale *sardegnacultura.it*, concordadu dae sa Regione e dedicadu a sos benes culturales de Sardigna, tenet totus sas pàginas web, fintzas in sardu. Si ddu podent lèzere informatziones e novas chi pertocant custos argumentos:

archeologia, teatru,
architetura, tzinema,
arte, mùsica,
arte nuràgica, traditziones,
crèsias romànicas, festas,
literadura, paesàgiu,
fotografia, cartografia

e de s'istòria de sa Sardigna, dae su perìodu nuràgicu a cussu contemporàneu.

In *LOGOS DE SA CULTURA* s'agatant informatziones de bibliotecas, archìvios, museos, monumentos, àreas archeològicas e itineràrios culturale.

De importu mannu sa setzione *LIMBA SARDA* cun sos aprofundimentos dedicados a s'istòria de sa limba sarda, a sas caraterísticas de su sardu, a sa literadura in sardu, a sa normativa e a sas àteras minorias linguísticas de Itàlia e de Europa. Una biblioteca manna est a disponimentu intrande in su zassu *Literadura*: si ddu atzapant òperas dae su 1400 a su 1900, romanzos e poesias, ditzionàrios e monografias, documentos comente a sos Condaghes e sa Carta de Logu, autores sardos e istrànzos bortados in sardu.

Poesia a bolu est sa parte dedicada a sas garas de poësia: un'archìviu multimediale cun sa vida de sos cantadores prus connotos, dae sos primos artziados a palcu fintzas a sos prus giòvanos de oe, e s'istòria de sas garas. Faghet fintzas a asciutare una bintina de garas.

Unu resumu curtzu de sa chirca sotziolinguistica de sa Regione Sardigna

Dae una chirca sotziolinguistica, fata dae sa Regione annos a como, dae unu campione de sardos intervistados resurtat chi:

- su 68,4% narat de connòschere e faeddare una variedade de sardu. In sos comunes cun prus pagu de 4000 abitantes sa pertzentuale àrtziat a su 85,5 % e in sos comunes cun prus de 100.000 abitantes sa pertzentuale calat a su 57,9%.
- Su 29% comprendet su sardu ma non ddu faeddat.
- Su 2,7% non ddu faeddat e nemmancu ddu comprendet.
- Su 89,9% est de acordu cun sa frase “*essende parte de s'identidade nostra, sa limba locale depet èssere sostènnida*”.
- Su 78,6% est a favore de s'insegnamentu de su sardu in iscola.

Ditzios

Carru andande, caminu fainde.

In domo de su ferreri sazos de linna.

Iscritu dae Marinella Marras